



آداب المريد

مؤلف حقيقت آموزی

عارف اکبر غوث الواصلين شيخ محي الدين عربي

قدس الله سر

FAKULTES

COPIANESINE

مترجمی

Celal Oltun

مختار

an Vakfıdır.

معارف نظارت جلیله سنک فی ۱۰ نیسان سنه ۳۰۹ تاریخلی

۱۷۶۶ نومرولی رخصتنامه سیله طبع اولمشدر

استانبول

(محمود بك) مطبعه سی — باب عالی جوارنده

ابوالسعود جاده سنده نومرو ۷۲

۱۳۱۰

آداب المريد

مؤلف حقيقت آموزی

عارف اکبر غوث الواصلين شيخ محي الدين عربي

قدس الله سره

ISTANBUL

Y. İslam Enstitüsü Kütüphanesi

Yıl No. 330

sayı No.

مترجمی

مختار

معارف نظارت جلیله سنک فی ۱۰ نيسان سنه ۳۰۹ تاريخی
۱۷۶۹ نومرو لی رخصتنامه سیله طبع اولمشدر

استانبول

(محمود بك) مطبعه سی — باب عالی جوارنده ابوالسعود

جاده سنده نومرو ۷۲

۱۳۱۰

کافل کورنمسی حسبیله عهد هایون ملوکانه سی
 مطلع الانوار فیوضات خدا و مجلای تجلیات فوز
 وهدی اولان خلافتما ب اعظم ولی نعمت بیمنت
 افخم حامی دین مبین و مؤید شرع متین پادشاهم
 الغازی «عبد الحمید» خان ثانی لازال محفوظاً بالسبع
 المثانی افندمر حضرتلرینک سایه موفقت سرمایه
 خلافتپناهیلرنده دستکاه آرای انتشار اولان
 آثار دیانتپرو رانه یه علاوة لسان عذب الیاب
 عثمانی یه بالترجمه آداب المرید عنوانیله طبع و نشرینه
 جسارت ایلدم. واللہ الهادی الی الصراط المستقیم

بسم الله الرحمن الرحيم

الحمد لله رب العالمين و صلى الله على سيدنا محمد
 وعلى آله اجمعين

بسم الله الرحمن الرحيم

هدایت آفرین مطلق تعالی شانہ حضرتلرینه
 فاتحه خوانی حمد و ثنا و خاتم النبیین توحید آموز
 لا اله سواه علیہ صلوٰۃ الاله افندمره عرض
 تحیات لاتحیی و ترضیه کوی ال واصحاب
 هدایت نما و دعای خلافتپناه عدالتفرمادن صکره
 خامه ران عرض مرام اولورم که رهنمای محققین
 مربی عارفین وارث علم نبی شیخ اکبر محی الدین
 عربی قدس الله سره حضرتلرینک { مالا بد منه
 للمريد } اسمیله دانشخانه کائناته یادکار ایلدیکی
 رساله مختصره نک دین و دنیاچه برچوق نصایح
 و وصایای نجات انتمای شامل و استفادة عمومیه یی

ای مرید ارشادخواه . طریق رشد و سداده
سالك اولمق ایستیان بر مریدك برنجی درجه ده
محتاج اولدیغی اعتقاد و عملك نه دن عبارت
اولدیغی بندن استكنناه ایلدك ایشته بو رساله یی
سؤالکه جواب و رهنمای صدق و صواب اولمق
اوزره تحریر و تألیف ایتدم . والله ولی التوفیق



﴿ فاتحه اعتبار ﴾

ای سالك راه طلب و مشتاق جمال حضرت رب .
مولای متعال حضرتلری بزی و سنی طاعت سبحانیه سنه
موفق بیورسون و همیشه رضای ربانیسنه مقرون اولان
ایشلرده قوللانسون . معلومك اولسونکه جناب
واجب الوجودك بزه قریبیتی انجق تعریف و تبیین آلهیسیله
بیانور . الحمد لله بو حقیقتی بزه بیلدیردی [١] و پیغمبران
عظام علیهم الصلاة والسلامی بعث و ارسال ایله سعادت
ابدیهیه واسطه وصول اولان یوللری کوستردی . بزه
رسل عظامك تبلیغات جلیله سنی آمنا و صدقنا دیهرك
حسن تلقی و قبول ایلدك . شمدی یالکز ایمان ایتدیكمز
اوامر الهیه و احکام شریعت احمدیه یی انفاذ و استعمال
ایتمك وظیفه سی قالدی . ایمدی ای مرید سکا واجب

[١] قرب الهی ونحن اقرب الیه من جبل الورید . ونحن
اقرب الیه منکم ولكن لا تبصرون . و امثالی نصوص قاطعه
قرآنیه ایله ثابتدر . مؤلف حقیقت آموز قرب ربانییه (الحمد لله)
کلمه جلیله سیله رمز و اشارت بیورمشدر . نهر رمز لطیف ،
روشن نظران عرفانه معلومدر .

اولان شيلرك برنجيسى خالق لايز الكى توحيد [٢]
 وحق الهيسنده دينلوب سويلنمى جائز ولايق اوليان
 شيلردن ذات اقدسنى تنزيه وتمجيد ايتمكدر .

[٢] توحيد لسان شرع ميپنده معبودى امر عبادتده افراد
 و بونكله برابر ذاتاً و صفاتاً و افعالاً و وحدتى اعتقاد ايتمكدر .
 قال الله تعالى قل انما يوحى الى انما الهكم اله واحد . وانما الله اله
 واحد . الله لا اله الا هو . بعض محققين بيوردى كه توحيد اوج
 قسمدر برنجى قسمى جناب حقاك ذات الهيسنى توحيديدر كه كندى
 وحدانيت مطلقه سنه شمول علمندن و (الهكم اله واحد) قول
 جليليله احديتنى اخباردن عبارتدر . ايكنجى قسمى حقاك خلقى
 توحيديدر كه بوده عبد مؤمنك موحد اولسنه حكم الهيسنك تعلقندن
 و قلب مؤمنده توحيدى خلقندن كناتيدر . اوچنجى قسمى خلقك حق
 توحيديدر كه عبدك الله تعالى حضرتلرينك واحد اولديغنى بيلوب
 اعتقاد ايتمى و يا آيات جليله قرآنيه سندن استنباطاً برلكنى اعتقاد
 و اخبار ايلسى و يا خود چشم قلبى اوزرينه رؤيت الهك غلبه ايتميدر
 ايمدى جناب حقاك براولديغنى اعتقاد و يا دليل نظرى ايله استدلال
 ايدن و يا خود خلقدن غافل اوله حق درجه ده ديده بصيرتى اوزرينه
 رؤيت حق غالب اولان كيسه به موحد اطلاق اولنور و بوتقديرجه
 توحيد اعتقاديدن بهره مند اولان كيسه به مؤمن . و توحيد
 استدلالى به موفق اولانه عالم . و رؤيت قلبيه ايله قرير العين عرفان
 اولان بختيار ازلى به عارف بالله دنيلور . بونلردن برنجيسى توحيد
 عوام . ايكنجيسى توحيد علما . اوچنجيسى خواص صوفيه عارفينك
 رؤيه الله . مقام شهود . مقام حضور . تعبير ايتدكلرى توحيد
 حقيقت انتمادر .

توحيد ايجون (قل لوكان فيهما آلهة الا الله لفسدتا)
 نص مبينى اساس متيندر [١] زيرا ذات باريدن بشقه
 اله بولنمش اولسه ايدى اختلاف ارادات حسبيله وجوداً
 و تعذراً بر فعلك و قوعى ممتنع اولوردى .

اي مرید پاك طينت سن شرك ايدن كيسه به عطف
 نظر مبالات ايمه واحديت الهيه ايجون دليل كتيرمه
 قالقشمه ؟ زيرا مشرك « و لئن سألتهم من خلق السموات
 و الارض ليقولن الله » قول الهيسى وجهله سنكله برلكده
 وجود خالق لايزالى اثبات و تسليم ايدنيور و سندن زائد
 اوله رق شريك بارى بولنديغنى دعوى ايليور . دعواى
 باطلنى اثبات ايتمك يعنى زياده قيلديغنى شريك ايجون دليل
 كتيرمك اكا دوشر .

[١] تفسير شريفى اى اكل رسل مشركينه دى كه اكر پرده
 و كوكده الله تعالى حضرتلرندن غيرى تدبير و تصرفه قادر الهلر
 بولنمش اولسه ايدى زمين و آسمان فاسد و تباه و امور كائنات
 متشتت و پريشان اولور ايدى زيرا اكر الهه نك اتحاد مقصد
 و مرادى فرض اولنسه بر مقدوره بر چوق قدرتك تعلق و طريائى
 لازم كله جك ايدى بالعكس اختلافى فرض ايدلسه مقدور تعويق
 دوشوب وجوده كلز ايدى بناء عليه مدبر عالمك براولمى لازمدر كه
 اوده الله تعالى حضرتلريدن .

توحيد بخشنده بوقدر معلومات سكا كفايت ايدر زيرا
وقت پك قيمتداردر اني ضايع ايلمكه گلز . عقل ايسه
سليمدر سلامتک اخلاقی جائز اولمز .

تنزيه مسئله سنه كنجه بومسئله زمانمزدده (يعنى مؤلف
حقيقت پرورك زماننده) ظاهر وغالب اولان طوائف
مشبهه ومعطله ومجسمه دنطولاي سنك ايچون مسائل
مؤكده معتنا بهادندر .

ايمدى اى قرداشم بحث تنزيهده (ليس كمثله شئ)
يعنى جناب اللهك مثل ونظيرى يوقدر (قول جليلنى نقطه
نظر اعتقاد آيله امر تنزيهده بوقول الهى . سكا كافيدر
بو آيت جليله نك ضد وعكسى اولان هر وصف زائد .
انك حكم حقيقت پرورينه لايق اولميان شئيته مردود
وعانددر .

بناء عليه امر تنزيهده بوقول الهيدن زياده برشى آرامه
و نظر اعتقادىكى بونقطه حقيقتدن آيرمه . بومبحث
قدسيده (كان الله ولا شئ معه) حديث شريفى دخی
آرايش صحيفه اعتباردر علمای اسلاميه بو حديث شريفه
(وهو الآن على ما عليه كان) جمله حكمت بيانى علاوه
ايلدير .

ايمدى اشبو حديث شريفك مدلول جليلندن
اكلاشديغى وجهله جناب واجب الوجود عالم موجود
دكل ايكن نصل اوصاف جليله ايله متصف ايديسه كائناتى
يارا تددن صكره ينه اوصفات مقدسه ايله متصفدر يعنى
ازلاً موصوف اولديغى اوصاف اقدسدن فضله كائناتى
يارا تسمندن طولاي ذات الهيسنه هيچ بروصف وصفت
راجع و زائد اولمى . تعالى الله عما يقول الظالمون
علواً كبيراً .

حاصلى كرك عالم و كرك ماسواى حق دنيلان
هر بر شئ مستور پرده عدم ايكن تنزيه بارى حقنده نه
اعتقادده بولنيور ايسهك وجود كائنات ايله برابر ينه او
اعتقادده بولك .

سكا واجب اولان شيلردن بريده توحيد و تبليغه
دائر اولوب كلام عربك شيوة استعمالنه كوره تشبيهى
ايهام ايدن آيات و احاديث شريفه نك و ياخود مهبط
وحى الهى اولان سائر انبيادن صادر اولان كلمات
منيفه نك معانيسنى علم الهى به تفويض ايدرك جمله سنه
ايمان ايتمكل ككدر؟ زيرا بو آيات و كلمات بديعه المأل .
مزايای مقدسه سنى اكلايانلره وحى وانزال بيورلمشدر .

(ليس كمثله شيء) تنزيه الهیسی فوقنده ایسه هیچ
بر منزّه جناب واجب الوجودی تنزیه ایده من . زیرا
حق جل و علا ذات اقدسنی کندی شان عظمت والوهیتنه
لائق اولان بو قول جامع المعانی ایله تنزیه بیوردی .
بناءً علیه امر توحید و تنزیهده مقدمات مبسوطه بی نقش
صحیفه اذعان ایت و کافه رسل و انبیاء عظامه و اندرک
طرف حقندن کتیردکلی و خبر و یردکلی اوامر
و احکامه حاصلی بیلوب بیلمدیکک تبلیغات نبویه یه ایمان
آیله و جمیع صحابه کرامک محبتیه اتصاف و عدالتلرینی
اعتراف قیل . حقارنده طعن و جرحی موجب سوزلرده
بولنه . انلری تنزیل مبین الهی و لسان حقیقت بیان
رسالتپناهی نه صفت و مزیتله تفضیل بیورمش ایسه
انکله بالا کتفا ایچلرندن برینی دیگرینه تفضیلدن صاقین
و جناب خالق مستعانک و پیغمبران ذیشانک تعظیم
بیوردقلی شعائر و ذواتی مشمول نظر تعظیم و احترام
قیل [۱] و طریقت جلیله صوفیه ارباب حقیقت نصابندن

[۱] ومن يعظم شعائر الله فانها من تقوى القلوب لكم فيها
منافع الى اجل مسمى آیت جلیله سننده مفسریندن علامه مغرب
شیخ اجد عجیبه رحمة الله علیه کندی تفسیرنده سلاطین اسلامیه بی

مروی اولان کلمات و احوالی و انلردن وقوعنی کوروب
و ایشیدوبده حوصله علمکه صیغشدره مدینک آثار
و اقوالی دخی تسلیم ایله . ای مرید هدایت خواه جمیع
خلقه حسن ظن ایتکی اعتیاد ایت . انلره سلامت
وجدان و سینّه صاف ایله معامله قیل و اخوان مسلمینه
عن ظهر الغیب دعا خوان اول . استغناپروران فقرایه یعنی
سالکان راه خدایه مقتدر اولدینک قدر خدمت و معاونت
و اولیاء الهی و کافه اماکن مقدسه و مبارکه و جوامع شریفه بی لازم
التعظیم شعائر الهیه جمله سندن اولدینی بیان ایلشدر .

حکیم ترمذی قدس سره نوادر الاصول نام کتاب فوائد
نصابنده خامه ران تحقیق اولوب دیدی که جناب واجب الوجودک
روی زمینده درت اثر قدسیت شعاری واردر بری قرآن عظیم
الشاندرکه کندی کلام بدیع بی مدانیسیدر دیکری کعبه الله
العیلادرکه طلعتسرای نور وقار یزدانیسیدر دیگر بریده سلطان
عدالت شاندرکه ظل هیبت و جلال ربانیسیدر دردنجیسی مؤمندرکه
ولی سبحانیسیدر انتباهپروران مؤمنین و مشتاقان جمال رب العالمین
قرآن کریمک لطائف حکمتنه امعان نظر عبرت و بیت الله الحرامدن
پرتو افشان اولان نور وقار الهیسنه حصر نظر بصیرت و سلطان
مؤمنیندن متجلی اولان ظل هیبت و عظمت ربانیه سنی ملحوظدیده
تعظیم و حرمت و ولی الهیسنک صدرندن پارلایان پرتو جلال
ربانیسیله تنویر باصره حسرت ایدرک بو دنیاچه کسب حضور
و روحانیت ایدرلر . انتهى

ایت . انلره خدمت ایتدیکگدن طولایی کندی نفسکده
بر کونه فضیلت و عزیت تصوراتمه . بلکه سنک خدمت
و معاونتکی قبول ایتدکلی حیثیتله منت و فضیلتی انلرده
کور . فقرانک هر درلو بار کلفتلرینی دوش همته آل .
اذا و جفالرینه قاتلاک . طور و مشر بلرینه قارشو
صبر و تحمل خصوصنده (ان الله مع الصابرين) حکم جلیلی
پیش نظر اعتناده طوت .

ذکر اللهدن . تلاوت قرآن کریمدن . حق یولندن
صائمش اولنلری ارشاددن . امر بالمعروف ونهی
عن المنکردن . طارغینلقله یکدیگرندن آیرلمش اولان دین
قرداشلر یمزک ارالرینی بولوب تألیف و اصلاح ایتمکدن .
صدقه یه تحریر و تشویقندن . حاصلی خیره دلالت ایدر
سوزلردن بشقه هر درلو فائده سز لقردیلردن کف لسان
ایله و سالک اولدیغک طوغری یوله سکا یاردم ایده جک
موافق ارقداش بول . زیرا پیرایه دار جوهر ایمان اولان
کیسه مؤمن قرداشنک معاونتیه قوت بولور . اهل
حقیقتی منکر و سنک فکر و مسلاک حق جویانه گه ضد
و منافق اولان کیسه سنک صحبتندن صاقین و هر حالده

سکا حق یولنی کوستره جک بر مرشد کامل آره و بوتشبتده
طوغریلغی التزام ایت . زیرا طوغریلق مریدک شعار
مخصوصیدر . تحقیق هر هانکی مرید حق یولنده طوغریلغی
التزام ایدرسه جناب هادی مطلق کنیدیسنی الندن
طوته جق و مقصدینه ایرشدیره جک بر مرشد کامله موفق
ایدر و حقنده هر بر شیطانی خیری الهام ایدیچی برر ملک
قیلر . طوغریلق برا کسیر اعظمدرکه هر هانکی شی
اوزرینه قونلسه اوشیئک عیننی تحویل و اصلاح ایلر
یعنی باقر اوزرینه وضع اولنسه انی التون ایدر .

سکا اهم و الزم اولان مهماتدن بریده لقمه حلال
ارامقدر زیرا طریقت جلیله محمدیه نک اساسی مال حلالدر .
عماد دین لقمه حلال اوزرینه قائمدر .

ای مرید . هیچ برشی ایچون خلقه تحمیل بار کلفت
ایتمه و کیسه یه ثقلت و یرمه و کولکلی غفلت اولومیه
اولمش اولنلردن نه کندی نفسک ایچون نه ده بشقه سی
ایچون لطف و احسان قبول ایتمه .

قز انجکده . سوزگده . جمیع حرکاتکده . ورع
و تقوایه ملازمت ایله مسکنجه . ییوب ایچه جکجه مائل

وسعت ورفاه اوله زیرا مال حلال اسراف و ابداری قبول
و احتمال ایتمز .

شوراسنی محقق بیلکه شهوات دنیویه نفوس
بشریه ده کوکله شنبه پک کوچ قوپاریله بیلور . بناءً علیه
بو تاجر بتکاه عالمده مرید وسعت و راحت آرا ماملیدر .
طعامی تقلیل دخی جمله مهماتنددر ، زیرا آزیماک
قلبه فرح ویرر . طاعات و عباداته شوق و رغبتی آرتدیرر .
تنبللکی کیده رر .

ای طالب حق کیجه کوندوز اوقاتکی عبادات
و طاعات ایله تعمیر و تنویره چالش خصوصیه رب
کریمکک حضور صمدانیسنده ال باغلیوب طور مق
ایچون شریعت غرای احمدیه نک سنی دعوت ایلدیکی
ساعتلرکه صلوات مفروضه یه مخصوص اولان بش وقتدر
اوقات مذکوریه کوزلجه حفظ ایله وانلرک اره سنده کی
اوقاتی اعمال صالحه و نیات خیریه ایله احیایه همت ایت .

اگر صنعت صاحبی ایسه ک بر هفته کچینه جکفی بر
کونده قازانمغه چالش . خلفای عباسیه دن هارون الرشیدک
اوغلی احمد سبکی کی که یالکز جمعه ایرتسی کونلری

عمله ک ایدرک بر کونده قزاندیغی شی ایله بر هفته کچینیر
ودیکر الی کوتنی طاعات و عبادات ایله کچیریر ایدی [۱]
صباح نمازینی قیلدقدن صکره کونش چیقنبجه یه قدر
نماز قیلدیغک یردن آیرله . ایکندی نمازینی ده قیلدقدن
صکره کونش غروب ایدنبجه یه قدر نمازگاهکی برافه
بوایکی زمان فیض رسانده خضوع و حضور ایله ذکر الله
مداوم اول . اوکله دن ایکندی یه وغرو بدن یاتسو یه
قدر یکر می رکعت نماز ادا ایدرک حضور الهیده طور مق

[۱] مؤلف حقایق پرور عارف اکبر قدس الله سره الاظهر
مشارالیه احمد سبکی قدس سره حقنده خامهران تحقیق اولدیغی
مبحثده بیوررکه یوما من الایام طائف بیت الله الحرام اولدیغی حالده
اوکوم صره بر جوان بدیع الجمالک مشغول طواف اولدیغی کوروب
امعان نظر ایتدیکمده اهالی و مجاورین مکهدن اولدیغی و هیئتنده
اثر سفر کورنمامسی جهته یکی کلش غربادن ده بولمندیغی تیقین
ایدرک بونک ارواح متجسده دن اوله جفنه حکم ایلدم و بومثللو
ارواحدن برینک اوزرینه حیاته کیلردن برینک نظری بلافاصله
منعطف و ممتد اولنجه ساحه ظهوردن غائب و نهان اولسی ممکن
اولدیغی بیلدیکمدن انی نظر کا همدن آیرمامغی التزام ایتدم جوان
مذکور اشواط طوافی اکمال ایدنبجه حجر اسعد پیشگاهنده طوردی
ووجه تابناکنی نم طرفه چویردی بنده کندیسنه تقریبه سلام
ویردم و کیم اولدیغی صوردم احمد سبکی یم دیدی . جمعه ایرتسی
کونلری ایشلیوب دیکر کونلرده اشغال دنیادن فراغت سببی

وبوصورتله جناب حقى ذكر ايتكم فضيلتني الدن قاجيرمه .
 اول نهاردده واوكله دن اول واوكله دن صكره وايكنديدن
 اول واقشام فرضندن صكره دردر ركعت نمازه دوام الله .
 ياتسو فرضنى ادادن صكره هرايكى ركعتده سلام ويرمك
 شرطيله اون ركعت نافله واوچ ركعت صلاة وتر قيل .
 اويقو غلبه ايتمكسزىن اويومه . اچيقمده قجه يمك يمه .

سؤال ايلدم جواباً ديدى كه جناب فاطر مطلق سموات وارضينى
 يوم احددن بدأ ايله جمعه كونه قدر يعنى التى كونده خلق وابدأ
 ويدنجى كوفى يعنى يوم سبتده شان وجلال الهيسنه لايق
 صورتده استوا بيورمديمى ؟ اوت ديدم اويله ايسه جناب قادر
 لايزالك قوللرى اچون حكمت نماى ايجاد كائنات اولديغى
 كونلرده قوللركده ذات الوهيتنه طاعت وعبادته اشتغال ايتلرى
 واستوا بيورديغى كونده ده كندى نفسلريچون چالشملى موافق
 دأب عبوديت دكليدر ؟ ايشته بو حكمته مبنى بنده يالكز جمعه
 ايرتسى كونلرى امر معيشته اشتغال وديكر كونلرده مساعى
 و اوقاتى عبادت مولايه حصر وابدال ايلر ايدم جوانى ويردكن
 صكره بشقه ديه جككز يوغيسه مساعده ايديكز ديمسيه بنده
 ملاقات واقعه دن طولايى كنديسنه بيان تشكرله برابر شريطه وداعى
 ايفا ايلدكن صكره اوزرنده كى نظريمى رفع اندر ايتمز چشم ظاهر
 بيندن نهان اولدى مشار اليك سبتى لقبيله اشتهار ايتمنه سبب
 شو صورت معيشتيدر . نفعنا الله ببركاته

كيديكك لباسى مجرد صغوغك و صيجاغك تاثيرندن
 وجوديكى اسيركه مك ، و عورت محانى اورتمك والحاصل
 عبادتن سنى منع ايدمك هر درلو حال واذابى دفع
 وازاله ايتكم نيتيله كى . اوقور يازار طاقدن ايسهك
 مصحف شريفه باقه رق او قومق شرطيله كنديكه قرآن
 كريمدن هر كون اچون برورد مخصوص اتخاذايت .
 قرآن عظيم الشانى اوقويه جغك زمان مصحف شريفى
 كوكسكه قارشى صول الكله طوت . وكوزك مصحف
 شريفه ناظر اولديغى حالده صاغ الكى قرآن كريمك
 حرفلرى اوزرينه يوروت . واوقوركن كندى نفسكه
 ايشتديره جك درجه ده سسكى يوكسالت . وفرقان كريمى
 ترتيل ايدرك يعنى عجله سز آهسته آهسته معانى
 جليله سنى دوشونهرك اوقو . سؤال رحمت سبحانيه يى
 مستلزم اولان آيات جليله ده رحمت الهييه يى يالواره رق
 ايسته . شاين اعتبار اولان آيات كريمه دن دخى عبرت
 آل . حاصلى هر بر آيت جليله استعاذه دن . استغفار دن
 وسائر دن هر نه حكم و حكمته دلالت ايلرسه مقتضاي
 نجات احتواسنجه معامله قيل . مؤمنلرك صفتلرينى

متضمن اولان آیات جلیله یی او قود یغکده ؛ بو صفتلردن کندکده موجود وسندن مفقود اولانلری تفکر ایله . تا که بوصفات ممدوحه دن سنده موجود اولانلری ایچون قلبکله الله تعالی حضرتلرینه شکر ایده سن و اولمیانلریچون تلافی مافاتنه یعنی انلرله اتصافه چالیشه سن ؛ منافق و کافر لرك صفتلرینی مبین اولان آیات جلیله یی او قود یغکده دخی كذلك صفات مذمومه مذکورده دن سنده برشی اولوب اولدیغنی دوشوک . انلردن سنده برشی وار ایسه رفع و ازاله سنه چالش ؛ یوقسه باری تعالی یه حمد و شکر ایله . سکا لایب اولان شیلردن بری ده جمیع اوقاتده نفسکله حسابلاشمق و کولکله کلان خاطره لره رعایت ودقت ایتمکدر . دائماً اللهم حیا ایتمکی قلبکله عادت ایتدیر زیرا سن حق دن اوتانورسه ک عندالله مذموم اولان خاطره یی کولکله یراشدیر منرسن و هر وقت قلبکی رضای الهیسنه مخالف حرکتیه میل و اصراردن منع ایدرسن . بنم بر شیخم و ارایدی که کوندوز و قوعبولان افعال و اقوالنی بر صحیفه یه یازاردی ؛ کیجه اولنجه او صحیفه یی کوزی اوکنه قویه رق آنده یازیلی اولان حرکاتی اوزرینه

نفسنی محاسبیه چکردی . یعنی اقوال و افعالی استغفاری موجب ایسه طلب عفو و مغفرت ؛ توبه یی مستوجب ایسه توبه و انابت ؛ حمد و شکر یی مقتضی ایسه شکر و حمدت ؛ ایدردی بن ایسه شیخمدن فضله اوله رق خاطره لریمی ده قید و تحریر ایدیورم .

سکا اهم و لایب اولان امور دن بریده اوقاتکی بوش و عبث یره کچیر مامکدر یعنی ایچنده بولندیگ هر وقتی کوزت . سنی او وقتده شریعت نه عمل و عبادته دعوت قیلدیه انی ایفایه مسارعت ایت . اکر فرض وقتی ایسه همان فریضه یی ادا قیل . اکر سنت و نافله وقتی ایسه انی ایفایه چالش و اکر مباح وقتی ایسه صنوف خیراتدن جناب حقه سکا مباح قیلدیغنی شیلرله اشتغال ایت .

الله تعالی حضرتلرینه یقین اولغنی موجب اولان اعمالدن برینی اجرایه باشلا دیغکده او عملدنصکره بشقه عمله موفق اوله جق مدت یاشایه میه جغکی فرض و تحیل ایله یعنی او عمل مشروعی رب کریمک دویوان عظمت و کبریاسنه کیره بیله جکک اک صوک عبادتک اولدیغنی تصور قیل . هر عملده بویله یپارسه ک عبادتکده اخلاص ایتمش اولورسن زیرا قبول اعمال اخلاصه متوقفدر .

سَنَك اوزرينه لایب و مهم اولان اموردن بریده دائماً
 طهارت اوزره بولمق لغکدر هر نه وقت آبدستک بوزیلور
 ایسه همان آبدست آل . هر نه وقت آبدست آیرسهك
 ایکی رکعت نماز قیل . مکرکه آبدست الیغک وقت ادای
 صلاتدن نهی اولندیغک وقتلر اوله . اوقات مذکوره
 کونشك طوغدیغی . غروب ایتدیکی . حال استواده
 بولندیغی وقتلردر انجق جمعه کونی بو حکمدن مستثنادر
 زیرا جمعه کونلری وقت استواده ادای صلاة جائز اولور .
 ای مرید: سَنَك اوزرينه لازم اولان شیلرک اک مهمی اخلاق
 حمیده ایله اتصاف و فنا خویلدن اجتنابدر . اقتضای حال
 و موقعه کوره هر کسه کوزل خویلدن بریله معامله قیل .
 مکارم اخلاقدن برینی ترک ایدن کشی بدخوی صاییلور .
 او یله کیمسهك صحبت و الفتندن چکل . معلومک اولسونکه
 خلق عالم ، صنف صنف اولدیغی کبی اخلاق حسنه دخی
 صنفلره منقسمدر بناءً علیه خلقه قارشو هانکی خویك اک
 زیاده استعمالی لازم ولایق اولدیغی بيلمکلكك ایجاب
 ایدر . ائمدی اصناف مخلوقاتك اک چوغه یارایه جق خلق
 و طبیعت ؛ انلره ایصال راحت ، و کندولرندن دفع اذیتدر .

بناءً علیه الله رضا سیچون دائماً بو خوی اجرایه چالش .
 بیل که خلق عالم حق تعالی حضرتلرینك قوللریدر .
 حرکتلرنده مسخر و مجبور درلر . ناصیه اختیارلری
 محرک حقیقلرینك ید قدرتنده در .
 « بُعِثَ لِائِمِّ مَكَارِمِ الْأَخْلَاقِ » حدیث شریفی
 منظوقنجه سیدالانیا علیه افضل التحایا افندمزك مجرد
 کوزل خویلرک اتمامی ایچون بعث بیورلمش اولمسی
 اخلاق حسنهك اهم مقاصد و آمال اولدیغنده شبهه
 بر اقدی .
 شریعت غرایی احمدیه استرسهك حقنی آل . دیلرسهك
 براق . دیو امر ایتدیکی و یاخود استرسهك جزا ایت .
 استرسهك عفو آیله . دیدیکی محله سن عفو و صفحه
 مائل اول ؛ تا که « فَمَنْ عَفَا وَأَصْلَحَ فَأَجْرُهُ عَلَى اللَّهِ » نص
 مبینی و جهله عفو و اصلاح ایدنلردن و اجر و مکافاتی
 جناب اللهه قالمش اولانلردن اوله سن . زیرا فنا لغه فناقله
 مقابله ایدرسهك « وَجَزَاءُ سَيِّئَةٍ سَيِّئَةٌ مِثْلُهَا » آیت جلیله سی
 حکمنجه کندی نفسکی سیئه یه محل ایتش اولورسن .

بناءً عليه سكا فئالق ايدن كيمسه دن قصاص طلب ايتمكدن
صاقين ؟ زيرا فئالق ايدن كيمسه يه ايدجك مقابله يي
جناب حق في الجملة سيئه تسميه بيوردي برده شرع شريفك
غضب ايت . ديدكي ايشده موجبنجه عمل ايله . الله
رضاسيچون بغض ايتماك كوزل خوي دكلدر . زيرا
بغض في الله عند اقدس الهيده مكارم اخلاق دن صاييلور .
سكا الزم اولان شيلردن بريده اعتقاداً و عملاً سكا
ضد و منافر اولانلرك و جنسكدن بولميانلرك الفت
و محبتلردن صاقمقدر فقط شو شرط ايله كه حقلرنده
سوء اعتقادده بولميه سن و خواطر سيئه دن برشيء تخطر
ايتيه سن بلكه بو صاقمه كي مجرد الله عبادتي و اهل اللهله
صحتي انلرك الفتته ترجيح و ايثار ايتك نيت خالصه سنه
بنا ايتليسين .

حيوانات حقنده عطف نظر شفقت و رحمت دخی
جملة لوازم حق شناسيدندر . زيرا حيوانات جناب خالق
لايزالك سكا مسخر بيورديغي مخلوقات دندر . بناءً عليه
حيواناتي تحمللردن زياده يوكلمه و بونلردن بنيللرينه
عظمت و جبروت ايله بنه .

ملك يمينك اولان كوله و جاريه لره و خدمتكارلرينه
كذلك حسن معامله ايله . زيرا بونلر سنك اخوانكدر .
حقلرنده نصل معامله و تصرف ايتديكي تجربه ايچون
جناب حق ناصيه اختيارلريني سنك الكه تسليم ايلدي .
سن دخی الله تعالى حضرتلرينك برقوليسن . بناءً عليه
كندی حقكده حق جل و علا حضرتلرينك نه يولده
معامله جميله و حسنه ده بولمسنی ارزو ايدرسك كوله
و جاريه لرينه و خدمتكارلرينه او معامله ده بولك كه
فضل و رحمت الهيه يه محتاج اوله جغك كونده بو صورته
مظهر مكافاة اوله سن . اكر متأهل ايسك كذلك اهل
و عيالكله حسن معاشرت ايله زيرا « اَلْخَلْقُ كُلُّهُمْ عِيَالُ اللَّهِ
وَ احِبُّهُمْ إِلَيْهِ اَنْفَعَهُمْ لِعِيَالِهِ » حديث شريفی منطوق منيفنجه
جميع مخلوقات بشريه عيال اللهدر و عند الهيده اك
زياده سوكيلى قول، عيالك منفعتلرينه اك زياده خدمت
ايدندر . سنده جملة عيالدنسك . حاصل كلام جناب
مالك الملك تعالى شانه حضرتلرينك سكا نصل معامله
بيورمسنی استر ايسك سنده خلقه عينيله او يله معامله

ایت. اکر اوغلك وارايسه اغراض دنيويه دن هيچ بر
غرضه مبنی اولمیه رق کندوسنه کتاب اللهی اوکرت
و آداب شرعیه و اخلاق دینیه یی محافظه ایتسی اسبابی
استکمال ایله و انی کوچکلکدن ریاضته آلدیر و ساحة
قلبه شهوات دنیویه یی اکدیرمه و کندوسنه زینت حیات
دنیا یی و آخرت نعم باقیه سندن قسمتنی اکسلده جک امور
و اشیای بغض و نفرت ایتدیر و بومعاملات ادب
پرورانه یی مالجه و پاره جه خست یوزندن یاپمه .

سکا لازم اولان امور دن بریده ارباب غفلتک
قیولرینه یاقلاشماق و مجرد مقاصد و مرادات نفسانیه
ایلله مشغول و شیرینکام اولانلره مصاحب اولما مقدر زیرا
بونلر کوکلی حقدن الیرلر و خطرگاه غفلته دوشورلر .
اگر برایشدن طولای انلره صحبت و الفتیه مجبور
اولورسه کندیلرینه نصیحت قیل و خیانت ایتکدن صاقین
زیرا بومعامله ک حقه قارشودر .

سن آنلره خیر خواهانه نصیحت و خیانتلرندن
محابت ایتدجه کندیلری سکا مسخر اولورلر و برده امر
دینده هر نه حالده بولورسه ک بولک . او حالدن

قورتیلوب دها کوزل برحاله وصولکی دائما جناب حقدن
نیاز و استرحامدن کیر و طورمه و جمیع حرکات و سکناتکده
حق ایلله حاضر اول یعنی اللهدن غافل اولمه .

ای مرید: طارلقده . بوللقده . وقت مسرتده . زمان
مصیبتده سکا انفاقی توصیه ایلرم امر انفاقه مسارعت
عندالهیده کی ارزاق مقسومیه کوکلیک و ثوق و اعتماد
ایتدیکنه یعنی اینانیدیغه دلالت ایدر . تحقیق بخیل اولان
کیمسه انفاق خصوصنده قورقاق اولور . زیرا شیطان
علی الدوام انسانه طول املی و جوق یشامق فکرینی
القا ایدرک دیرکه : « اکر مالکی انفاق ایدرسه ک هلاک
اولورسن . زیرا الک بوش قالور . اصحاب و اقرا نك آره سنده
رذیل و رسوای اولمق تهلاک سینه دوشورسن . بناءً علیه
مالکی امساك ایلله و تقلبات دهره قارشو احتیاطکارلقده
بولک . شمدی کوردیکک بوللغه الدائم . کله جک سینه
جناب اللهک نه یاپه جغنی بیلمزسن » و اکر اورتالقد
قحط و غلا وارايسه شیطان دیرکه « مالکی کندی
نفسک ایچون صاقله . کیمسه یه برشی ویرمه . بو قحط
و غلالتک نه وقت مندفع اوله جغنی تخمین ایدمه مزسن .

کورینشده بو حال شدت برطرف اولمق شویله طورسون
زیاده لشه جکدر. سن نفسکی کوزت. الگده برشی قالمزسه
کیمسه دن سکا فائده یوقدر هرکسک نظرنده منفور
ومستثقل اولورسن و خلقه ثقلت ویررسن یوزیکک
صوبی دوکیلور « ایشته بو وسوسه شیطانیه قلبه مسلط
اوله اوله انسانی بخل و خستک درجه منتهاسنه واردیر
و بوسبيله استعین بالله » وَمَنْ يَوْقِ شَحِّ نَفْسِهِ فَأُولَئِكَ
هُمْ الْمَفْلَحُونَ « آیت کریمه سنک حکم منیفندن بهره دار
فلاح و سلامت اولمقدن » وَمَنْ يَخْلُ فَإِنَّمَا يَخْلُ عَنْ نَفْسِهِ «
قول الهیسنندن دخی عبرت آلمقدن محروم براقیر. بزم
عندمزرده آیت بخلک عقبنده کی » وَإِنْ تَوَلَّوْا يَسْتَبَدِلْ
قَوْمًا غَيْرَكُمْ « قول الهیسنندن اکلاشیلان معنای حقیقت
انما ایجابجه طریقت جلیله صوفیه ده بر انسان اهل الله
واولیا به التحاق ایلد کدنصکره اظهار بخل و شح ایدرسه
نائل اولدینی مقام عالیدن ایندیریلوب یرینه سخی
وجوانمرد اولانلردن بر کریم نصب و ترفیع ایدیلور.

حاصلی بخیل اولان کیمسه « رَبَّنَا أَطْمِسْ عَلَيَّ أَمْوَالِيهِمْ
وَأَشْدُدْ عَلَيَّ قُلُوبَهُمْ » آیت کریمه سنک متضمن اولدینی
حکمتی ادراک ایتامشدر بوبلاغ بلیغ الهی حضرت موسی
علی نبینا و علیه الصلوة والسلامک فرعونک علیه
وقوعبولان دعاسی جمله سندندرکه جناب حق فرعون ایله
عونه سنک هلاکفی مراد بیورنجه حضرت موسی
علیه السلام انلرک بخل ایله مرزوق اولملرینی اجابتگاه
عادل مطلقدن طلب واستدعا ایلدی بودعانک تأثیر بلیغیه
کندولرینه بخل و خست عارض اولوب بوسبيله ایچلرندن
فقیر اولانلری آچلقله هلاک اولملریله جناب حق فرعون
وقومنی بو یوزدن اخذ واستیصال بیوردی. ودخی بخیل
اولان کیمسه « إِنَّ لِلَّهِ مَلَکَيْنِ فِي كُلِّ يَوْمٍ يُنَادِيَانِ عِنْدَ كُلِّ
صَبَاحٍ اللَّهُمَّ اعْطِ كُلَّ مَنْفِقٍ خَلْفًا وَكُلَّ مُمْسِكٍ تَلْفًا » حدیث
شریفنک حکمنندن ده بهره مند عبرت اولمامشدر. معنای
جلیلی جناب حقک ایکی ملکی واردر که هرکون صباح
وقتنده یارب هرمنفق اولانه انفاق ایتدیکی ماله بدل

و خلف ویر و هر ممسك مالنی اتلاف آیلہ قولیلہ ندا
ایدرلر دیمکدر وسید کائنات علیہ افضل التحیات
افندمزه ایکی کنز لایفنی ویرلدیکی زمان انلری اخذ
و قبول یرینه ترکلرینی اختیار بیور مسنک حقیقت
نجات غایتنی دخی اکلایه مامشدر .

و ابوبکر الصدیق رضی الله عنه سید کائنات صلی الله
علیه وسلم افندمزه حضور سعادتنه ساهنه جمیع مالنی
کتور و بده یا ابابکر چولغنه که چوجغنه که نه براقده که ، سؤال
رسالتپناهیسنه قارشی . اللهم و رسولنی براقدم ، یولنده
جواب ویردیکنده و حضرت عمر رضی الله عنہک كذلك
حضور عرش آستان سید الکوینہ مالنک یاریسنی عرض
و تقدیم ایتدیکی صروده اعرف الانبیا افندمزه اهل
و عیالکه نه ترک ایلده که ، سؤال حکمت اشتمالنه مقابل
یا رسول الله مالنک نصفنی ترک ایلدم دیدیکنده ، ارا کزده کی
فرق و تفاضل ایکی کله کزک ارا سنده کی فرق و تفاضل
ایلہ متناسبدر خطاب رسالتپناهیسنک دخی اصل و مزیتنی
بیله مامشدر . حاصلی امر اتفاق . دنیا و آخرتده رزاق
حقیقیدن استجلاب ارزاقه سبیدر . ایمدی ممسك و بنجیل

اولان کیمسه جناب حتی اترام و کندی مالنه اعتماد ایتمش
اولور و نقد موجودینه وثوق و اعتمادی رب کریمنه اولان
وثوق و اعتمادندن دها قوتلی اولمق لازم کلور بوایسه
ایمانه طعن و خلل ویرر نسأل الله العافیہ .

ایمدی ای مرید : بوللقده و طارلقده انفاقه دوام آیلہ
فقر و ضرورتدن قورقه جناب حق سکا وعد بیوردیغنی
کرك بالذات کنده و کرك جمیع عالم ایسته سون ایسته مسون
انجاز و ایفا بیورر هیچ بر جوانمرد اصلا هلاک اولما مشدر
ا کر بورساله مزده آز یازمغنی التزام ایتماش اولسه ایدک
شو تفصیلاتی تأیید ایدہ جک دها بر چوق اخبار ، درج
و ازبار ایدر ایدک .

﴿ فصل ﴾

ای مرید : کیمسه یه اوفکه و غضبکی کو ستر مامکه چالش .
اوفکه و غضبکی کو ستر مدیکک حالده جناب ارحم الراحمینی
ارضاء و شیطان لعینی اغضاب و نفسکی تربیه و اصلاح
ایتمش اولورسن . زیرا غضب هوای نفس مقتضاسندن
اولدیغندن اظهار غضب ایتدیکنک صورتده نفس سرکش

بالطبع هو اسندن کچر وسکا اطاعت ایلر خصوصیه
 اوفکه کئی کو سترمیه جک اولور ایسه ک غضبه سبب اولان
 کیمسه نک کوکافی سویندیرمش و فعلنه جزا ایتامش
 اوله جقسک که بومعامله ک اوکیمسه نک نفسنجه کنديسنه
 جزا ایتمکدن زیاده مؤثردر خصوصیه آنک دائره
 حق وانصافه رجوعنه باعث واعتراف قصورینی مستلزم
 اوله بیلور بناءً علیه بونصیحتی قبوله اهتمام وبوخوی
 التزام ایله بونک اجر وثوابنی البته میزانکده بولورسن.
 بومسئله ده اصل فائده نک اک بیوکی وسوینجک اعظمی سن
 اوفکه کئی کیزلر سه ک جناب عادل مطلق دخی غضب الهیسنی
 موجب اولان افعالکدن طولایی سنی مؤاخذه بیورمن
 زیرا سنجه باعث غضب اوله جق بر معامله ده بولنان
 کیمسه بی عفو ایتدی ک ایچون جناب حقه بو معامله
 عفویه کله سکا مکافات بیوره جقدر بو حقیقته کوره ارتق
 مؤمن قرداشکک قصورینی عفو ایتمکدن واذاسنه تحمل
 ایلیمکدن دها بیوک فائده تصور اولنه بیلورمی ؟ جناب
 حکیم لایزال قوللرینه سنک نه معامله ده بولنمهی اراده
 بیورمش ایسه سکاده عینیه اوله معامله بیورر بناءً علیه

سندده بوصفت دلپورانه وخصلت وداد کسترانه ایله
 اتصاف وتخلقه سعی واجتهاد ایله زیرا بوکوزل خوی
 خلقک قلبلرینه ایراث محبت ایدر محبوب الهی صلی الله
 علیه وسلم افندمن یکدیگریمزله سویشمکی ومحبت اوزره
 بولنمهی امر و تائید بیورمشدر بوخصلت جمیله ایسه محبتی
 ایجاب ایتدیرن اسبابک اک بیوکارندندر.

﴿ فصل ﴾

ای مرید: دائماً مقام احسانه ملازمت ایله زیرا احسان
 حق تعالی حضرتلرندن حیایه ومحسن اولان قلبده تجلی
 تعظیم خدایه سببدر. حضرت جبریل امین علیه صلواة
 المعین « مَا الْإِحْسَانُ » یعنی احسان نه در سؤال بیورمسی
 اوزرینه اعرف الانبیا علیه افضل التحایا افندمن « انَّ
 تَعْبُدَ اللَّهَ كَأَنَّكَ تَرَاهُ » یعنی الله تعالی حضرتلرینی
 کوررجه سنه ذات اقدس الهیسنه عبادت ایتمکککدر
 جواب حقیقت نصابنی ویردیلر ایشته مقام احسانک
 نومرتبه سی یعنی جناب حق کوررجه سنه عبادت ایتک

محسن اولان مؤمنك قابنده تجلی تعظیم الهی به بادیدر بو
 جوابدن صکره ینه صلی الله علیه وسلم افندمن «فَانْ لَّمْ تَكُنْ
 تَرَاهُ فَاِنَّهُ يَرَاكَ» یعنی سن الله تعالی حضرتلرینی کوره من
 ايسهك جناب حق سنی کورر بیوردیلر ایشته بو مرتبه
 احسان دخی محسن اولان مؤمنك جناب اللهدن حیا سنی
 مؤدیدر صلی الله تعالی علیه وسلم افندمن «الحیاء خیر کله»
 حدیث شریفله حیانتک هپسی خیردن عبارت اولدیغنی
 بیان بیورمش اولدیغنه کوره بر مؤمنده حیا بولنجه
 او مؤمنده فنالق بولنه من وکذلک قلبی حیا قاپلاینجه دنیا
 و آخرتده او یله بر کوکل صاحبی فنالق کوره من. شواییکی
 مرتبه احساندن ایکنجی مرتبه یعنی قلبه حیا غلبه ایدنجه
 او یله بر کوکل صاحبی هیچ بر کسه نك اوزرینه دعوای
 تحکم وربانیت اتمکه قالقشمن ایمدی مقام احسانک شو
 ایکی صفت جلیله سنی احرازه اهتمام و دائما مقام احسانی
 التزام ایله تحقیق شو ایضاحات ایله احسانک فائده
 سعادت عانده سنی سکا افاضه ایلدم.

﴿ فصل ﴾

ای مرید: سحر وقتنده استغفاره و ذکر پروردکاره
 دوام و ملازمت ایت. معلومك اولسون که استغفار، کناه
 عقینده اولور سه کناهی محو و ازاله ایدر. طاعت و احسانی
 متعاقب و قوعبولور سه نور اوزرینه نور، و سرور اوزرینه
 سرور اولور. ذکر الله دخی قلبی پاره پاره و هر پاره سی
 بر طرفه آواره اولمقدن یعنی قلبک قصد و همتنی پریشانلقدن
 قورتاروب بر نقطه ده اجتماعنه خدمت ایدر و صفای
 خاطری استلزام ایلر. اکر ذکر اوصانور سه نك
 قرآن عظیم الشاندن اوقو، لکن اوقورکن معانی سنی
 دوشونملیسن و توحید و تنزیهه دائر آیات کریمه به تعظیم
 ایلملیسن و خیر و رجایی متضمن آیات جلیله ده رحمت
 الهیه بی استملیسن و خوف و وعید آیتلرنده حفظ آلهیده
 بولمکی جناب ارحم الراحمیندن یالوارملیسن و قصص ام
 سالفه بی مبین اولان آیات جلیله دن دخی عبرت آلملیسن
 تحقیق قرآن کریمك متضمن اولدیغنی معانی لا تحصانك

اختلاف و تنوعی حسبیلہ قرائتندن کیمسہ یہ ملال و اوصانج کلز .

﴿ فصل ﴾

ای مرید: کناہ ایشلمک ایچون کوکلیگده کی اصرار دو کومفی چوزمکه چالش . لکن بومهم ایشه قدرت و امکان بوله منسک، مکر که نفسکه خطاباً « ای نفس سرکش شمدی الدیغک نفسدن بشقه نفس الہ بیلہ جککی بیلور میسک؟ اللہ بیلور اما، احتمالکه شمدی الدیغک نفس حیات دنیادن اقصوک نفسکدر اولوم بونفسده یاقه که صاریلور . حالبوکه سن فنالق اوزرینه اصرار ای دیورسن . کناہ اوزرینه مصر اولنلر ایچون عند عادل مطلقده طاغیرک طاقت کتوره میه جکی عذاب الیم واردر! او یله بر عذابہ سنک کی ضعیف نصل تحمل ایدر؟ اللهم توبه و رجوع ایلہ . زیرا سن بیلورسن که پنجه جانربای اجل، نه وقت کریبانچاک حیاتک اوله جقدر تحقیق « وَلَيْسَتِ التَّوْبَةُ لِلَّذِينَ يَعْمَلُونَ السَّيِّئَاتِ حَتَّىٰ اِذَا حَضَرَ أَحَدَهُمُ الْمَوْتُ قَالَ اِنِّیْ تُبْتُ الْاَنَ » نص

مبینی وجهله ارتق ترک حیات ایدہ جککی تیقن ایدنلرک توبه سی مقبول الہی اوله من « وَاِنَّ اللّٰهَ یَقْبَلُ تَوْبَةَ عَبْدِهٖ مَالَمْ یَغْرِغِرْ » حدیث شریفندن دخی مستبان اولدیغی اوزره قول . حالت غرغریه کلد کدنصکره ایدہ جکی توبه دن فائده کوره من . نیجه آدم یر ایچر جماع ایدرکن موت ناکهانی یه اوغرا دی و یاخود او یقوده ایکن خواب ابدی یه واردی، که ایچلرنندن هر هانکیسی دها اول جناب حقه توبه و رجوع ایتماش ایدیسه ذنوب اوزرینه مصر اولدیغی حالده حفره مماته دوشدی « و امثالی مواعظ مؤثره ایلہ نفسکه وعظ و نصیحتدن خالی قالمیه سن . اکر دائماً بویولده نفسکی تنبیه و ایقاظه چالیشورسه ک باذن الله عقده اصرار چوزیلور . والا فلا

﴿ فصل ﴾

ای مرید: ظاهر او باطناً تقوایی التزام ایلہ . تقوی عقاب الہیدن صاقمقدر ، تحقیق عذاب عادل مطلقدن قورقان

کیمسه رضای الہی بہ موافق اولان افعاله مسارعت ایدر
 بوبابده اصدق القائلین « وَیَحْذِرُکُمُ اللّٰهُ نَفْسَهُ وَاعْلَمُوا اَنَّ اللّٰهَ
 یَعْلَمُ مَا فِیْ اَنْفُسِکُمْ فَاحْذَرُوْهُ » بیوردی تقوی و قایه دن مشتقدر
 زرهلرک و سپرلرک اک قوی واک بیوکی ایسه وقایة اللهدر
 واسطه رحمت مولا صلی الله تعالی علیه وسلم افندمن « اَعُوْذُ
 بِرِضَاکَ مِنْ سَخَطِکَ وَبِمُعَافَاتِکَ مِنْ عُقُوْبَتِکَ وَاعُوْذُ بِکَ مِنْکَ »
 مناجاتیلہ دعاخوان اولمشلردرکه مزایای حقیقت احتواسی
 سخط و غضب ذوالجلالکدن. رضای جمالکّه و عقوبت
 و عذابکدن معافات الہیہ کّه وسندن سکا صغیریم دیمکدر .
 ایمدی سنده فعل الله ایلہ یعنی رضای الہی بہ موافق
 عمل ایلہ غضب الہیدن صاقین و هر قنغی شیدن قورقار
 ایسهک اوشیئہ سنی ایرشدیره جک یولدن چکل . تحقیق
 طاعت سرمنزل سعادتہ ایرشدیریجی طوغری بر یول
 اولدیغی کبی معصیت دخی شقاوتہ ایصال ایدیجی بر طریقدر
 رضای الہی بی قزانہرق غضب ربانیدن اتقا ایدہ بیلہ جکک
 کبی سعادت یولنہ دوام ایلہ طریق شقاوتدن وجنتہ یارار
 اعمال ایلہ دہ نارجهنمدن اتقا یلرسن . ایشتہ بویله جه منازل

تقوی اوزرینه یوری . الله تعالی حضرتلری تنزیل کریمندہ
 « وَاتَّقُوا اللّٰهَ وَاتَّقُوا النَّارَ » بیوردی . بناءً علیه تعریف
 ایتدیکم صورتدہ طریق تقوایہ سلوک ایدر سہک ان شاء الله
 تعالی نجات بولورسن .

﴿ فصل ﴾

ای مرید : کنناہ ایشلمکده مصر و مستمر اولدیغک
 حالده کرم ربانی و حلم صمدانی یه مغرور اولمقدن صاقین .
 بوبابده سنی ابلیس الدادوب دیرک « سنک کنناہ و مخالفک
 اولماش اولسه ایدی کرم و عفو الہیسی و رحمت و غفران
 نامتناهیسی نصل ظهوره کلوی ایدی » بوسوز ایسه قائلنک
 نہایت مرتبه جہلندن ایلروکلور . زیرا حکیم لایزالک
 قولنی طاعت الہیہ سہنہ موفق و رضای ربانی سہنہ موافق
 اولمیان ایشی یایمقدن وقایہ بیورمسی دہ کرم و رحمت
 صمدانیہ سی جملہ سندنر و ابلیس سکا دیرک « سنک ایچون
 مقام احساندہ و خیرات و حسناتدہ بولنانلرک درجه سہنہ
 وصوله یول یوقدر . زیرا انلر طاعات الہیہ دن موفق

اولدقلری شیئله بوعالمده مظهر رحمت ارحم الراحمین اولوب
نوبتلرینی صاودیلر . روز فردای قیامتده ایسه کرم
وحلم ربانیسی ورحمت وغفران صمدانیسی قوللرندن عاصی
اولنلر حقنده ظاهر اولور « زینهار ابلیسک بو سوزینه
قائمہ والدائمہ و نفسکی شرنندن محافظہ ایلہ واکا جواباً
دی که . حلم و کرم الهی و عفو ربانی حقنده سویلدیک
سوزلر صحیحدر . و قوللرک کناهلری و معصیتلری اولماش
اولسه ایدی زعمنجہ بوصفات الہیہنک آثاری ظهورہ
کلزدی . بودہ طوغریدر بوبابده آثار صحیحہ و اخبار موثوقہ
ورود ایتشددر . لکن ای ابلیس بوسوزکله رحمت الہیہیہ
طیانہرق جناب معبود حقیقی یه عصیان ایتکلکم ایچون
کرم الہی ایلہ بنی اغوا ایتک می استیورسن ؟ بنم معفو
و مغفور و مرحوم اولہ جقلردن اولدیغمی نرہدن بیلورسن
اوت ، جناب حق قوللرندن دیلہ دیکنی کرم و مغفرت
الہیہسنہ مظهر بیورہ جقدر ، آمنا . نصل کہ عبادندن عاصی
اولانلر دن بر طائفہی عقوبت قهارانہ و عذاب و نقت
عادلانہ سیلہ تعذیب ایدہ جکدر . بن ایسه بو ایکی فرقہنک
هانکیسندن اولدیغمی بیلمیورم . یالکز کندیمی معصیت

ایچنده کوریورم احتمال کہ . جناب حق بنی بوعالمده معصیتدن
توبہ ایتک موفقیتندن نصل محروم براقش ایسه نار جحیمہ
کیرمزدن اول عفو الہیسنندنہ اولہ محروم بیورر و بندن
انتقام آلور واکر دین اسلام اوزرینہ اولکلکم نصیب
اولور ایسه بو انتقامدن صکرہ نار جهنمدن چقارر
معاصی ایسه کفر تاتاریدر . بالفرض اکر بن مظهر عفو
الہی اولہ جق طاقدن اولدیغمی و کنہا سبیلہ مؤاخذه
اولنمہ جغمی قطعاً بیلمش اولسه م احتمال کہ سوزیکہ
الدانوردم مع هذا بودہ بنجہ سوء ادب و محض جهالتدر
بلکہ عذاب الہیدن امین بولندیغم فرض اولنہ بکاواجب
اولان وظیفہ تشکراً و جناب حقندن حیاء جہد و طاقتمی
طاعت الہیہیہ بذل و صرف ایتکدر . جناب حق ایسه علی
التعین بویله بر تبشیر ایلہ بنی تأمین ایتدی ، بلکہ امر معصیتده
عفو و عذابی آرہسندہ باشی بوش براقدی او حالده سنک
بویلان سوزیکہ نصل الدانہیم . و دائماً فنانی امر ایدن
نفس امارہنک مواعدینہ نہ قوتلہ دایانہیم .

﴿ فصل ﴾

ای مرید : نفسکده ورعی التزام ایله ورع نفسکده شبهه و تردد ویرن هر برشیدن صاقنمق دیمکدر « دَعْ مَا يُرِيكَ إِلَى مَا لَا يُرِيكَ » حدیث شریفی که مال حکمت اشتمالی شول شیدده که سکا شک و شبهه عارض اوله وسنی اوشی خایجانه واضطرابه دوشوره انی ترک ایله سکا شبهه و خلجان ویرمیان شیئه رجوع ایت و تعبیر دیگر اوزره بر شیئک حل و حرمت و سنیت و بدعتنده شبههک اولسه اوشی کرک قول و کرک فعل و کرک عبادت و نکاح و سائر معاملات اولسون آنی براقوب حالی متیقن و حقیقتی معلوم اولان شیئه عدول ایله دیمکدر بو حدیث شریف ورعک حقیقتنی و صورت اجرا سنی مبنیدر . همیشه بو حدیث جلیل رسالت پناهینک حکم حکمت پرور یله عامل اول و منوال مشروح اوزره کوکلی شک و شبههیه دوشورن شیئه ولو که محتاج اولسهک و اوصرده آندن

غیر یسنی تدارک ایدمه مسهک دخی آنی الله رضا سیچون ترک ایله و استعمالدن صاقین . بویله پیارسهک محقق بیل که جناب حق اوشیدن خیرلیسنی احسان بیورر . فقط استعجال اتمه . ایمدی ای مرید دینک تملی و حق یولی اولان ورع حالیه حاللنورسهک هر عملک خالص و صاف اولور و هرایشک حسن نتیجه بولور . احوالک یولنه کیرر . کرامات الهیه هر یوزدن سکا تجلی ایدر . جمیع امور کده حفظ الهی ایله محفوظ و مأمون اولورسن . بوالطاف الهیهیه مظهر اوله جفکده بزجه هیچ بر شبهه یوقدر . لکن طریق ورعدن یوز چویرر و بی پروا هر شیئه یوز ویرر ایسهک ، عادل مطلق حضرتلری سنی مخذول و پریشان ایدر و کندی نفسکه حواله ایلر . شیطان هر طرفدن اغوا و اضلاله قدرتیاب اولور . بناءً علیه صاقین قرداشم استطاعتک مقدارنجه ورع یولندن ایرمه .

﴿ فصل ﴾

ای مرید : بو عبرتخانه دنیا ده زهده ملازمت و آز شیئه رغبت ایله .

﴿ استطراد ﴾

دنیا مزرعه آخرت و واسطه سعادت ابد غایت
اولدینی حیثیتله حد ذاتنده مذموم اولق بشویله طورسون
ممدوح و مقبولدر . اصل مذموم اولان شی مطالب
و شهوات دنیویه قلباً و قالباً میل ایله حقندن غافل اولمقدردر .
حکمت نمای « ما ينطق عن الهوى » علیه افضل التحايا افندمزه
دنیا نهدن عبارتدر دیو و قوعبولان سؤاله جواباً « الدُّنْيَا
مَا اَلْهَاكَ عَنْ مَوْلَاكَ » بیورمشدر که مأل حقیقت اشتمالی
دنیا ، مولای کریمک ذکر و طاعتندن سنی اشغال ایدن
و غفلته دوشورن شیدر دیمکدر . شو حالده مذموم
اولان نفس دنیا دکل ، انسانی حقندن غافل قیلان اشیادن
عبارتدر « مَنْ آثَرَ الدُّنْيَا عَلَى الْآخِرَةِ ابْتَلَاهُ اللَّهُ بِثَلَاثَ هَمٍّ
لَا يَفَارِقُهُ أَبَدًا وَفَقْرٌ لَا يَسْتَغْنِي أَبَدًا وَحِرْصٌ لَا يَشْبَعُ أَبَدًا »
حدیث شریفی که معنای حکمت احتواسی دنیایی آخرته
ترجیح ایدن کیمسه بی باری تعالی اوج شیئه مبتلا ایدر

بریبی هم واضطر ایدر که ابداً کندیسندن آیرلق بیلمز
ایکنجیسی فقر قلبددر که مدة العمر او کیمسه بی دنیایه
عرض احتیاجدن مستغنی قیلمز . او چنجیسی حرص
و طمعدر که کندیبی مادام الحیات طوقلق حس ایلمز .
دیمکدر بوده یوقاریده آرایش بخش صحیفه سطور اولان
حدیث شریفک مضمونتی متضمندر . امعان نظر دقت
اولنورسه بو حدیث شریفک مبین اولدینی احوال ثلثه
آخرتی اونودان و حریص دنیا اولانلرک جمله سنده
هر آن وزمان ملحوظ دیده اعتبار اولور . فقط ترك دنیا
تعبیرندن کوته نظرانک اکلایشی وجهله انسانک ایشسر
کوچسر گوشه نشین عطالت و بطالت اولسی لازم کلور
کبی بر معنا استنباط ایدلما ملیدر . زیرا (اِنَّ اللّٰهَ يَحِبُّ اَنْ يَّرَى
الْمُؤْمِنَ مُحْتَرِفًا) و « اِنَّ اللّٰهَ يَحِبُّ الْعَبْدَ الْمُحْتَرِفَ » و « الْكَاسِبُ
حَبِيبُ اللّٰهِ » و امثالی احادیث شریفه نك دلالتی وجهله جناب
روزی رسان انس و جان حرفت و صنعت و تجارت اصحابی
مشمول نظر رضا و رحمت بیورر . بو حکمته مبنیدر که کافه
یغمبران عظام برر صنعت و حرفتله اشتغال ایلدیلر حتی

مرویدر که حضرت عمر رضی الله عنه پیغوله کزین عطالت،
بر جماعت مسلمینه تصادف ایلدی. سز کیمسکیز دیوب.
بز متوکلیندنز. جوابی النجه حاشا متوکل دکل متاکسکیز
زیرا متوکل، بطن ارضه القای حبوب ایله رزاق کائناتک
لطف عمیمه توکل واعتماد ایدن کیمسه در. بیوردی.

بعض علماء محققین دخی شرع شریفک حرقت و صنعت
و تجارت کی اباحه ایلدیکی کسب مشروعی ایمان مرتبه سنه
ملحق کوروب وجوب مؤ کدله واجبدر دیدیلر و بو
وجوبی « وَإِذَا قُضِيَتِ الصَّلَاةُ فَانْتَشِرُوا فِي الْأَرْضِ وَابْتَغُوا
مِنْ فَضْلِ اللَّهِ » آیت جلیله سنه بنا ایلدیلر شو حالده ترك
دنیا دن مقصد اختیار عطالت دیمک اولیوب بلکه تکاثر
و تفاخر نقطه نظرندن حلال و حرام و حقوق عباد
دیمیه رك جمع اموال دنیایه حرص و انهماك ایتامک
و دنیا بی آخرته ترجیح ایده جک واللہ تعالیٰ حضرتلرینی
اونوده جق صورتده محبت فانیاتی قلبه یرلشدیر مامکدر
ومن الله التوفيق .

دنیا دن طالب اوله بیله جکک برشی و ارایسه اودم

وجه حلالندن بریه جکله کیسه جکدن برده بارینه جق بر
مسکندن عبارتدر بناء علیه طلب و رغبتکی یالکیز بوکا
قصر آیله. ابنای دنیا نك حلال و حرام دیمیوب جمع ایتدیکی
امواله و بویوزدن نائل اولدیغی سعادت حاله میل و رغبت
ایتمه .

دنیا بقاسی اولیان بر عرضدر. دنیا یه راغب اولان
کیمسه دنیا دن ابدأ مقصدینه نائل اولمز. زیرا دنیا یه رغبت
ایدن کیمسه نك دنیا ده کی امللری جداً چوق اولور
حالبوکه جناب رب منان اموال دنیا دن او کیمسه یه هر نه
قسمت ایتمش ایسه انجق انی عطا و احسان بیورر. او کیمسه
ایسترسه دنیا یه راغب اولسون، ایسترسه اولسون، عند
الهیده مساویدر یعنی هر کس تجلیخانه (نحن قسمنا) ده
تقدیر کرده آلهی اولان شی هر نه ایسه ایستر ایستمر
انجق اکا دسترس اولور بنابرین دنیا پرست اولان کیمسه
بالطبع کثیرالآمال اوله جغندن و مقدر اولیان امللرینه
ایسه قدر لایتغیر آلهی اقتضا سنججه بالضروره نائل
اوله میه جغندن حیاته اولدجه دائماً غمناک و حزین و معنأ

دخی مغضوب رب العالمین اولور. نفس الامرده طالب دنیا
دکز صوی ایچن کیسه کیدرکه دکز صویندن ایچدجه
حرارتی آرتار. اعرف الانیا افندمک دنیا بی جیفه
ومزبله یه تشبیه بیورمسی میل دنیادن صاقمق ایچون سکا
برعبرت کافیه در. ایدم جناب رزاق لایزال دنیادن سکا
نه تقسیم و تقدیر بیورمش ایسه اکا راضی اول. زیرا رزق
مقسومگی ایستسه کده ابا ایتسه کده سکا ایصال بیورر.

جناب حق حضرت موسی علیه السلامه «یا ابن آدم

ان رَضِیتَ بِمَا قَسَمْتُ لَكَ اَرَحْتَ قَلْبَكَ وَاَنْتَ مَحْمُودٌ وَاَنْ لَمْ
تَرْضَ بِمَا قَسَمْتُ لَكَ سَلَطْتُ عَلَيْكَ الدُّنْيَا تَرْكُضُ فِيهَا رَكْضَ

الْوَحْشِ فِي الْبَرِّيَّةِ ثُمَّ وَعِزَّتِي وَجَلَالِي لَا تَنَالُ مِنْهَا اِلَّا مَا قَدَرْتُ

لَكَ وَاَنْتَ مَذْمُومٌ» خطاب الیهیسیله تجلیهای تنبیه وایقظاظ

اولدی که مال حکمت اشتهالی ای آدم اوغلی اکر تقسیم

ازلئ الیهیمه راضی اولورسه ک ممدوح و محمود اولدیغک

حالده قلبکی راحتلندیرمش اولورسن واکر سکا تقسیم

و تقدیر بیوردیغمه راضی اولمز ایسه ک سنک اوزرینه

دنیا بی مسلط ایدرم بیابانده حیوان وحشینک سکرتمسی
کی سنده ساحه دنیاده هارل هارل ایاق تپرسک مع هذا
عزت و جلاله قسم ایدرمکه دنیا رقه سنده نه قدر سکرتمسه ک
مقدوح و مذموم اولدیغک حالده ینه انجق تقسیم و تقدیر
بیوردیغم شیئه نائل اولورسن.

ای قرداشم! فرض ایت که جناب حق جمیع اموال و نعم
دنیا بی سکا بخش و احسان ایلدی سنک نهایت دنیادن
استفاده ایده جکک شی بارینه جق برمسکندن. وجودیکی
اورته جک بر لباسدن. آچلیغکی دفع ایده جک برپارچه
یه جکدن. عبارت دکلیدر؟ بواوچ شیئه ایسه دنیا نك هر یوز
چویردیکی آدم نائل اولمقله برابر بو عالمده راحت قلب
و آخرتده خفت حساب سببیه سکاراجح و فائق اولور.

ای مرید: صاقین سنک فنا بولمقلغکله برابر فنا
بوله جق اولان متاع دنیا یه مولای کریمکدن اولان حظ
و سعادت ابدیه کی صاتمه. احتمالدرکه طلب دنیا یولنه ایلک
اته جغک آدیمده اجلک کلیر. دنیادن چیقار کیدرسن
او حالده آمال دنیویه گدنده برشی حاصل اولماش بولنور
بیلیرسن که دنیا نك اولادی اولدیغی مثللو آخرتکده

اولادی وارد ر . سن نبی ذیشان علیه الصلوة الرحمن
 افندمرك امر ایتدکاری کبی اولاد آخرتدن اول . دنیا
 اولادندن اوله . قرآن کریمی او قودینغکده کلام مولا کئی
 تفکر قیل . حرامدن . حقوق ناسدن . اسرافات بی
 فائده دن صاقتمه نك لزوم و وجوبی درك ایتمك ایسترسه ك
 استعید بالله « مَنْ كَانَ يُرِيدُ الْحَيَاةَ الدُّنْيَا وَزَيَّنَّهَا نُوفَ الْيَوْمِ
 اَعْمَالَهُمْ فِيهَا وَهُمْ فِيهَا لَا يَخْسَوْنَ اُولَئِكَ الَّذِينَ لَيْسَ لَهُمْ
 فِي الْآخِرَةِ اِلَّا النَّارُ وَحَبِطَ مَا صَنَعُوا فِيهَا وَبَاطِلٌ مَا كَانُوا
 يَعْمَلُونَ [١] وَمَنْ كَانَ يُرِيدُ حَرْثَ الْآخِرَةِ نَزِدْ لَهُ فِي حَرْثِهِ

[١] تفسیر شریفی مجرد حیات دنیایی و تکثیر اموال و اولاد
 کبی زخارف فنا انجای قصد ایدرك اختیار اعمال و شدائد و متاع
 دنیویه بی احتمال ایدن کیمسه لرك مکافاة اعمالی عزم و مقصد لری
 وجهله بونشته اولاده ایفا ایدرز انلرك غرضی مجرد آمال دنیایه
 مقصور و محصور ایسه کندیلری خیرلی عمللرندن هیچ برینك
 مکافات عاجله سندن نقص و خساره او غراملر ایشته بونلر شول
 قاصر نظران همت و ظاهر پرستان غفلتدرکه کندیلری ایچون آخرتده
 نارحرماندن غیری هیچ برشی یوقدر زیرا مکافات حسناتلری بودنیاده

وَمَنْ كَانَ يُرِيدُ حَرْثَ الدُّنْيَا نُؤْتِهِ مِنْهَا وَمَا لَهُ فِي الْآخِرَةِ مِنْ
 نَصِيبٍ [٢] آیات جلیله سنه عطف نظر تامل ایله .

﴿ خاتمه اعتبار ﴾

ای مرید : حق جل و علا . سنی خواب غفلتدن

ایفا اولندیغی ایچون یوم حسابده کندیلرندده سیئاتدن بشقه برشی
 قالمز سیئاتك مجازاتی ایسه نار بعد و حرمان و اندن مترتب الام
 و احزاندر یومثلولرك دنیاده ایشلدکاری حسناتك جمله سی ساقط
 و باطلدر .

[٢] نشئه اخری یعنی نعمتسرای عقباده بهره مند اثمار مثوبات
 و کرامات اولمق ایچون بونشته اولی یعنی تجربتخانه دنیاده اعمال
 صالحه و اخلاق حمیده تخمینی زرع ایدن کسه نك ثوابی مضاعف
 و افزون و طرف عظیم الشانمزدن تفضلاً و تکرماً کندوسنی مظهر
 لذات و نعم کونا کون ایلرز و مزرعة دنیاده زرع ایتدیکی بذور
 اعمال صالحه دن ینه بودنیاده اقتطاف اثمار مکافاة ایتمك ایستیان
 کیمسه یه ده مقصد عاجلی نه ایسه انی و یررز لکن او کیمسه لذات
 و شهوات فانیة دنیویه بی آخرتک لذات و نعم سرمده سی اوزرینه
 اختیار ایتدیکنندن طولانی لذات باقیه و فتوحات روحانیة آخرتدن
 اولان حظ و نصیبندن نفسی محروم ایتمش اولور .

بیدار و هرنفسده آدیم آتدیغك رجعتكاه سرمدينك
حقایقندن بهره مند عرفان و ابتصار بیورسون . بوتجر تخانه
فناده مادام الحیات هر نه ایشلمش و سویلمش ایسهك
جمله سی ایچ-ون، دیوان مقدس الارکان عادل حقیقیده
وقفه کیر حساب، و عرق ریز مناقشه اکتساب اوله جغکدن
هیچ بر آن تغافل و تجاهل اتمه، و مع هذا بونلرك
محاسبه سنی زنه ار دار جزایه براقه . بوفرصتخانه امکانه
ایکن حسابی نفسکله کوروب بتیرمك و سندی سپیدی
بوراده ییرتوب آتمق سنك ایچون چاره نجاتدر .

ای قرداشم (حاسبوا انفسکم قبل ان تحاسبوا و زینوها
قبل ان توزن علیکم) امر رسالتینا هیسنه قولاق طوت .
انفاس معدوده حیاتك مهلت و مساعدده سنندن اغتنام
فرصتله تنهانشین حفره خاک اولمزدن اول . نفسکی محاسبه یه
چك . حیاتده بولندیغك مدتجه نفسك تحصیلدار کبیدر .
سندده آنك حسابنه مأمور مسئولسك . تحصیلدارك
حسابنی کورمز ایسهك بالآخره حساب و مسئولیت سکا
توجه ایدر . بنه علیه فرصت فوت اولمزدن اول انکله

حسابلاش، زیرا شمدی بویله یامیز ایسهك روز وجدان
سوز حسابده سنکله برابر بولنمشجه سنه بیلیرمکه . فریاد
واستمداده باشلایه جقسك . اما بر مجیب و مد درس
بوله میه جقسك . یالکز جانب فرمانفرمای قهار مطلقدن
(اقرأ کتابك کفی بنفسك اليوم عليك حسبا) خطاب
ازلیسنی و (بز عظیم الشان سزده رسل عظام بعث وارسال
ایتمدکی . طوغری یوللری کوسترمدکی . صباح اخشام بزی
ذکرو تسبیح ایتمکی امر ایتدکی) و بواوامر الهیه مزی
اجرا ایچون لیل و نهاردن سکا وقت مساعد ویرمدکی)
عتاب لم یزلیسنی، طویه جقسك . ایش او پرده سه یه کلد کدنصره
ندامت و پشیمانی فائده ویرمز . نفسکی محاسبه یه چکمکده
تاخر و تسویف ایدیورسهك بیلکه کثیف الحجاب
و مطرود عن البابسك او حالده نه یاپه جغکی بیلورمیسك ؟
افراد آفریده دن هیچ بر فرد ایچون اندن بشقه مرجع
استمداد بولنمیان او باب رحمتی یانوب یاقیله رق چال، و کشف
حجاب کشفته چالش . بودنیاده سنی محاسبه دن ورب
کریمکی تذکر و مراقبه دن منع ایدم بیله چك شی اوج

آفتدن عبارتدر . بری تمادی غفلات . دیگری وساوس
وهواجس نفسانیه دن جستجوی لذات . اوچنجیسی
ملاحظه عادات ومألوفاتدر . ایشته بو اوچ آفتدن تحفظ
واجتناب ایدن کیمسه ان شاء الله الرحمن ایکی عالمدهده مظهر
نجات وسلامت اولور والسلام ختام وصلى الله على سيدنا
ومولانا محمد وعلى آله بكل لسان فى كل حال ومقام .

فیاتی یوز پاره در